

呂晚村先生文集

呂晚村先生文集卷四

書

與徐方虎書

江城度歲景物光陰別見客中興趣雖遊橐不甚稱
意然吟咏所得自足豪矣目疾困人知清齋習靜不
日自可弟爲荒村風鶴不能鼓枻候晤西望快然老
畏城市甚於萑苻不自知失保身之術亦足見其迂
戾而闇於事理將來欲令家人入城以此身委之而
已小兒鶩下愧勿能教幸得親門牆正賴鞭箋之力
萬勿以成人待之昔友文字刻板已竣專待大序行

世弟友大半皆兄友也而弟平生於交遊間情事及雲雨變幻之來亦惟兄知之最深幸勿惄一援筆揮灑此意拜賜多矣姚江近狀亦各行其志但依附其門者必見攻以示親信如演義所云投名狀者真可怪笑也有如別諭其曲折可以意想吾輩亦無如之何止當謹默自全庶幾遠謗之道吾兄以爲何如承名泉珍味之惠至謝至謝新刻金正希稿及先外祖稿各一冊附正晴窗引眺時不無少助也餘不多及

答徐方虎書

弟病極矣光陰無幾汲汲打包猶恐不及玷鬼模糊
苦不相投臥想碧巖蒼弁之間自是神仙會集非病
僧所得與也有人行於途賣餠者隨其後唱曰破帽
換糖其人急除匿已而唱曰破網子換糖復匿之又
唱曰亂頭髮換糖乃皇遽無措回顧其人曰何太相
逼生弟之雍頂亦正怕換糖者相逼耳兄不哀其窮
而加歎美焉毋乃過耶旌德湯生不特爲弟寫樣并
管刻局中事若此公一出則十餘人皆須散遣矣故
不能也有呂建侯者寫字亦相同但手慢每日不及

五篇故其人自不肖寫今特令之過從若希見以爲可用則留之否則急遣歸第處整補等事皆賴之也小兒刻文一本呈正幸批抹教之

答韓希一書

年餘間別時時往來於懷方老屢約爲弁山之遊而弟衰病日逼生趣索然九原不可作者行將就之耳登臨之事度非所能矣昔人所以歌爲樂當及時也試牘文字弟素性所不喜蓋時論以至庸至俗之文則名之曰墨卷體而以無理無法者則名之曰考卷體世間惟此二種惡業流傳耳弟之惡考卷體也又甚於墨卷以其尤遠於理法也交游間有投贈者卽以糊壁覆瓿未嘗有所留貯故無以應命惟質亡集有故人試牘附覽弟處自開刻局有二十許人皆恃

湯生一手寫樣給之而刻局中一應收發料理亦皆
湯生主其事若令出門一日則二十人皆須罷遣矣
故勢有不能有呂建侯者其字與湯生同但手慢每
日不及五首其人自以爲非策故不肯寫樣而爲琢
硯鐫碑帖雕印鉦刻扁額齋聯諸事時下無出其右
者今特令走謁試鑒定何如明文備從未繙動承令
表弟索取謹以原本納還幸致之舍姪於杭遇關姓
者雜貨店人也而好名自言有明文數千肯相借未
及浹月卽促索至加訶責急還之乃已於此悟文之
宜買不宜借也先兄遺文之賜如獲拱璧感謝感謝

蒼水先生已得其全稿若月函固無可著者若其人
已古可入質亡集耳小兒新刻一本小草三帙呈正
尊公前幸致候伏枕率率不備

與張午祁書

尊恙餌藥來有進無退自是賤技庸劣不能測中病機耳更酌改備擇善自顧養博採名術以復天和此遠懷所禱也古老志節之士雖時喜禪悅然非其安身立命處若付之闇匪是以西裔待之使不得正其終恐有所不忍其慘毒又甚於暴露矣第計山中葬埋爲費有限且禍福無主隨地可藏幸致山谷兄圖其合於義理者爲之勿以苟且辱志士若資有不給吾輩朋友之誼各有不得辭羣力衆舉似亦易易也草率附復諸容晤悉不一一

與何商隱書

違教幾兩載不免有悵悵之歎先生歷境雖因而其道益光正足以見識養之邃人之無良曾無與於先生者也若弟滿前刺觸動足成讐事皆由已不闢他人其取困又與先生不同不審先生何以終教之乎春夏營構山菴數間雖未盡落成而泉生室中峰當牖外澄潭可釣峭壁可登松徑竹林可以避客亦復欣然忘老第苦空谷無音寂歷誰語安得晨夕高賢奉几杖以開蒙翳哉倘先生不棄荒昧秋間拏艇奉迎試憑眺其間可居可遊惟先生指趣所適得遂追

隨之志固不勝大願也志雒所患當以溫補收功自
是正論第其中次第宜先滋補而後議溫或可以不
溫而愈若必至溫則又進一步說也至其婚事竊以
爲禮節易而居處難此須先生與渝老幾臣熟計長
便弟無從籌畫僅可從諸公後少効涓埃之力耳志
雒東來率復不盡

復苗采山劉素治書

兩兄奇才駿志嵒起西陲又與家姊丈游熟聞雒闕之旨前歲遠辱惠書示以佳製開緘循讀光燄四射吳越善文之士未能或之先也天下將治氣自北而南今南風日靡而北有兩兄卓然自拔於方隅非將治之賴乎克兩兄之力詎止陵轢時賢以之入古作者之室固優爲之然弟之屬望於兩兄者抑又不在此也譬之賈焉視市集之闕乏者而爭致之獲利十倍然猶庸賈也今之善其文以取華望者是也若擇市集之所賤棄者獨居焉是爲奇貨其售無期而利

不可量賈斯良矣今天下所羣棄而不取者何物乎此奇貨也兩兄亦有意耶弟老且病矣爲俗氣所苦薙髮入山與野僧柴漢爲侶不足與聞斯道惟兩兄勉之而已家刻二冊小兒妄作二帙附呈記室用博一粲便郵附候不盡所云

與朱望子書

屢得甥字去年以書信附蘇州而郵客已行竟不得致快然閱甥近文較昔條達知勤業不怠日有進請可喜可慰第尚未能開拓境界不脫膚淺平實四字大都好通篇逗點無可抹亦無可圈也其病坐無意思故無曲摺生發今特寄與程墨一冊金正希黃陶菴稿各一冊吾兒竿木集一本其中金稿與竿木集尤爲吾甥對證之藥當細玩之家中尚有歸太僕唐荊川稿不以相寄因此等文字甥宜慢看不能得其精微高妙之故則徒益其膚淺平實而已爲甥計急

力闢生徑使心思別出乃有進處否則終無當也吾
痔瘻增劇連年咯血今聲嘶痰嗽不止日就枯瘁加
以塵埃嬰逼意益不堪遂削髮爲僧結茅埭溪之妙
山苟延性命急欲完知言集及一二種要槩文字而
精神已不支擣筆收拾不上家中子姪門人之文槩
不能批看故甥文亦不及動筆也苗兄劉兄文甚佳
北方有此神駿尤不易得愧殺南人矣觀其志趣亦
不凡似不甘以時下自了者故以數言懲懲之晤間
爲道斯意醫理難精以餉口之心爲醫更必不精其
說甚長俟歸時面言可耳便信行遠不及多語惟善

自愛以副遠念五舅字與朱大甥

與朱望子書

男子志在四方爲行其道也若漂泊則何志之有然一身猶可以自解奈何以白髮之親流離塞上倘有意外不得遂首丘之仁是誰之責歟甚至以故婦爲辭則三妃不從蒼梧豈大舜反戀皇英之墓耶若以新恩得所樂而忘歸寧陷其親於荒徼此尤與於不仁不孝之大者甥又何以自立於兩間也情切故詞直惟甥勉之十月九日舅字與大甥

與董方白書

久不與賢者相對繫念無時形之夢寐得近札知以
館穀北留較之奔馳此爲良矣若得閉戶讀書做些
着實工夫爲益更不小只恐此中應酬世故又從而
牧之耳此不必講義理只與論利害則作宦之危自
不如處館之安宦資之不可必自不如館資之久而
穩也惟幕館則必不可爲書館猶不失故吾一爲幕
師卽與本根斷絕吾見近來小有才者無不從事於
此其名甚噪而所獲良厚然日趨於閃爍變詐之途
自以爲豪傑作用不知其心術人品至汙極下一總

壞盡驕詭並行機械雜出真小人之歸而今法之所稱光棍也究之所取亦東坍西漲有虛聲無實際歲月之間消落如故落得個終身狼藉耳其家人見錢財來易皆驕奢不務本業則又數世之害故不可爲也來札云長安富人肯爲捐納以其輸錢得官於心未安而止此固是矣然賢者見識於理尚隔一針在而言以文以錢有以異乎無以異也若他人代爲捐納則雖亦有所不可使其人卽不望報我何義以處之如其不能不望報也則此官豈可爲乎辭受取予立身之根本足下不安於輸錢而反安於

他入之捐納此吾所謂差却一針也滾滾馬頭塵中
自然無人物在裏亦不足較量但足下自能高着眼
孔跔得脚住則所望於賢者不輕耳僕迂病日甚卽
邑里紛紛俱不欲相近看此世界中真無一足把翫
者惟殘書數種未了思後來歲月無幾將屏棄一切
汲汲了此此僧家之打包者也但恨同志稀少無處
商量向日張佩璁頗聰明細心有志向上欲引以爲
助而天奪之遽邑中止一吳自牧天資過人近年德
業日新以爲賴有此人而七月間又以疾暴亡看此
氣象火候殊不佳顧影焚焚有口掛壁真無生人之

樂矣不知天意欲何如數書又安能以一手一足成之也言之可悲可痛令弟文字甚長進志趣亦漸入高明第苦無定叢工夫打成片段耳嘉善柯寓匏到燕曾相會否此兄質性極美有意於正業爲文亦高雅無俗韻華閨中絕少者只是門第習氣重世故深擺脫不得亦是無可奈何然素心奇賞此意時時不泯得閒卽與商論想互有益也選文行世非僕本懷緣年來多費賴此粗給遂不能遽已其中議論去取未勉招人憎忌目下刻成墨評一部中多直抹批駁恐外間不無謠諑或別生是非故尚游移未出不知

當復如何幸爲我察之得早見裁示侍爲行止也冗
次率率不備俟後再寄

壬辰科張君名永祺者余極喜其文細實有本領
聞其宦在燕中幸爲我一訪之得其全稿爲妙其
墨卷鄉會俱不會見欲讀尤切目下程墨完卽料
理知言集起矣凡明文不論房行社稿皆爲我留
神訪之又湯若望有天文實用一書幸爲多方購
求一部感甚某又言

寄董方白柯寓匏書

正月入埭買得青山潭石壁一帶溪山幽峭樂而忘返留連者兩月昨始歸家見手札知近詣加進不爲聲塵所動甚慰甚慰且有寓匏相講習喜可知也墨評之不宜寓匏別時見規正與足下言合感愛我之深鄙意竟皮闔不出矣臨奇來述時論有招致詩文之事頗有齒及者聞之不勝震悸區區本末足下所知也昔人所云不值半文者豈敢昧忘耶初與寓匏論文字曾及舊絕句一首正爲此耳此係某平生關目惟足下急與寓匏審察消弭之策知我只二公所

恃爲保護餘生者不小也激切激切餘悉載臣札中
心緒惶擾諸不盡

答柯寓匏曹彞士書

使歸後甫畢塵事而小孫患痘殊劇旬日來未免憂懸忽忽無緒昨晡始有生意得力疾展讀坐此遲爽耿耿何如兩兄文各負奇偉寓匏天才駿逸迥絕塵姿多於醞藉中挺瀟洒不羈之致彞士風骨雄勁所向空濶一瞬千里不可捉搦不謂於文字頽澌時覩此異材又能閉戶相砥礪不屑稍近流俗只此雅懷已足千仞乃冲襟虛挹問不擇人村子環顧其中則皆君之所餘也又何以相益無已竊有所質兩兄之爲此文也其心有篤好爲文固當爾耶抑外間風旨

乍更爲決科之利耶篤好以爲當爾則志定而氣堅必有進而無退不至於古人不止彙士文有云孤行無偶而不懼舉世菲薄而不慙此見道之言也兄試自舉勘果不負斯語乎若猶未也則決科之意急而爲風氣所拘也風氣有何定一津要倡論於上朝行矣升沉局幻暮復變焉爲文而由此則志惑而氣躁庸流乍撼之不動也數鉅公沮之稍動矣數名宿引之又動矣或得或失誘之挫之則大動而不能自主矣出門抱行卷自以爲逢時數十日抵郊衢聞時尚又不爾回惑失措則今日所爲安知非他日所悔乎

文由心生心正則文正心亂則文亂此不可不辨也
某之論文亦止如此未嘗期其書之必行世世之從
吾言也適與時論相湊謂其功足變風氣爲近日選
家之勝此某之所深恥而痛恨者也但使舉世噪罵
取以覆瓿黏塵錮其流傳信從如蘇氏烏臺案朱門
僞學禁莫不拒絕遠避而有人焉獨以爲不可不業
此此則某之論文果有功而其不止於文者亦騁騁
盡出矣兩兄於此得毋猶有所疑乎前在金陵有時
貴相識者欲某定其房稿會有絕句云自古相知心
最難頭皮斷送肯重還故人今有程文海莫便催歸

謝疊山此心言也兩兄深知此意至燕市絕不齒及
若有問者第云衰病事事頽廢更無足道者則知我
愛我之至也

寄柯寓匏書

相晤輒遽別恨無旬月之留從容商論今復有此壯遊一摩青雲便與枋榆睽隔卽行止亦不得自由正不知相見何時也僕杜門掃迹心知最稀自辱交以來每嘵兄冲襟摯性曠才嗜古近世所不多見甚思合併共事所欲期於相成者頗鉅惜雲泥勢阻更不勝悵惆耳所教孫言之戒非愛我之至安得聞此敢不書之几牖以自警僕自計生平未嘗開堂說法亦未嘗與人往復爭辨比來謝病不對客對客亦不敢談及此事惟是時文批評中酒酣耳熱未免放言兄

所聞其由此乎抑別有爲乎幸明示之以便省改也十二科墨選中多直抹以此遲疑未出今承教自當處置亦幸知之早也燕市見惡者不少望時爲察之有聞卽密示爲囑大兒金陵初歸課義尚不廢名山業未會見拜惠謝謝四方交游間幸不忘蒐討之囑至禱至禱凍石因祝兼山未到故不會動筆此必須兼山奏刀方不失筆意俟其來卽與合作奉至宅上但不知宅上須授何人燕中寓在何所俱望示知便於寄札也武功錄前本先附璧提綱尚欲一閱他日馳納閩茶毫筆伴緘爲舟中消暑一笑率復不盡

寄柯寓匏書

久不得書信正切懸念接手教甚慰降辱餘年不欲
掛齒親友皆却之尊惠遠頗不獲返納破例登受愧
謝愧謝某病甚矣血脉瞀亂神志改常每一觸發卽
忿戾肆妄亦自知其不祥然不能自制此不治症也
紅塵瀆洞響震林莽憂惶悸慄病益增劇自念麋鹿
之性久與世不相入固知死安於生脩不如短所依
違沾戀者惟耿耿舊聞孤危無寄思收羅散軼考正
其是非編就數書質之後世子雲庶幾無負此生而
已而看此火色造物似不相容前有字寄方白囑致

足下冀知已保護之得了前件耳然天下事每出意
料之外或非人力所及此卽命也豈可逃乎來札云
歲前有所聞不知何事龔士云恐知之不能相忘此
猶是相知未深語凡謗必有所由來定非無根者或
我實有過而陷於不知或彼言雖浮其實而自處原
有未盡卽竟屬空中樓閣而我之所以致彼憎者亦
必有其端正好藉以自察若聞言生恚但咎人誣不
責已過此俗情之所同稍知爲已者决不如此文穆
不欲知姓名乃大臣含容之量非儒者克治之義也
然某尚疑文穆此語亦是黃老之學并不是古大臣

含容真量如其言倘一知姓名卽終身不忘其胸中亦隘甚矣天下安得如許不見不聞者以全大臣度量耶此等見識橫於胸臆名爲黃老實不免於鄉原流俗之歸陰私忮刻潛隱竊發其患有不可勝言者吾輩講究正要打破此箇病根庶幾有進脚處耳足下天性粹美志趣超然雖處風塵知不爲習俗所移第患於是而非真妄界頭或未能一劍兩截討個決斷分明則未免頭出頭沒久之亦恐把握不住耳率意妄揣不知賢者以爲何如得便幸勿吝往復正好商量也茲因敝親魏方公兄之便匆匆附此見方白幸

卽示之有信與彞士均質以此意未必無所攻錯也
手顫不能細字囑兒子繕白不盡某頓首

與柯寓匏書

把別忽已經年某衰病侵尋嘔血不已而塵墮全集
去除不能遂於夏間削頂爲僧自名耐可號曰何求
更字不昧行徑如是想足下聞之不直一笑也帶水
睽隔令祖母之變絕不相聞有失奉慰歉然歉然足
下天性粹美氣宇渾厚自是遠器第向來習染深鋼
不易解脫未免擔閑耳今乃於讀禮靜處奮然發學
道之志可敬可喜所謂近世學者患在直求上達此
總是好名務外徒資口耳於身心實無所得至目前
紛紛則又以之欺世盜名取貨賄營進取更不足論

也要之真欲爲此學須是立志得盡下手便做不但求辨說之長始得從上聖賢道理已說得詳盡又得程朱發揮辨決已明白無疑今人只是不肯依他做故又別出新奇翻案耳所謂至簡至當豈有外於四書五經者只是做時文人看去只作時文用爲詩古文者看去只作詩古文用若學道人看去便句句是精微正當道理更何經書之有哉第程朱之要必以小學近思錄二書爲本從此人手以求四書五經之指歸於聖賢路脈必無差處若欲別求高妙之說則非吾之所知矣要之此事須面談非筆墨所能達也

明史提綱從未卒業不詳其書得失向見范洧川參
龍子集及所論曆法奏疏知是讀書博辨之人疑其
書必有異故留此欲待稍暇今承索取附使奉還他
時有遺力及史事尚冀借看也學蔀通辨取歸復爲
他友借去近聞平湖顧蒼巖已刻板印行則購求亦
甚易耳又荷珍惠深愧何以當此感謝感謝使者遽
旋草草未盡俟晤言不一

與吳玉章書

山中遠歸惟慮後期爽訂抵舍不見信息知非吉徵
不謂果罹大故思惟至性崩摧何以堪此又聞有傷
體之事不禁輿然伏念數年相與且謬有師弟之稱
自恨平時不能指陳正道推明禮意足下聰明果毅
必奮然以聖賢之孝道爲歸不至毀性滅義不以禮
事其親如此此非足下之過而某之罪也夫復何言
夫人子於親苟可以致心竭力於踵頂豈有愛焉然
古來稱至孝者帝王中無如虞舜賢士中無如曾輿
矣乃一則父置之死而不死一則慎保手足而無敢

傷思此一聖一賢於父母病革時豈於身有所惜於心有所未盡於此事有所不能以遺後人以突過哉亦以止於孝之道有所不可也禮於居喪瘠毀尚比不慈不孝故衰麻有期哭踊有節若任心行之以不孝爲孝亦復何所不至近世不明禮義剗股斷臂之事紛紛多有正人君子亦嘗深論其非而流俗溺惑銅不可解然猶多出於無知之氓正賴讀聖賢書如玉章者有以救正之耳奈何不務法虞舜曾輿之事親而下效愚夫愚婦之所爲豈愚夫愚婦之爲反有加於虞曾者耶今玉章此舉震動瀕蒙流俗無知轉

相傳誦惑世誣民爲害非細四方有道之士必指某而斥之曰夫夫也固嘗與之遊矣其爲邪說然耶其告之不忠耶某亦誠無所辭獨負疚無分毫之益於足下侈然以師道自居真愧悔難安耳成事不說今復何言惟足下勉自愛率慰不具

五章公等。既誠菴嘗受業諸侯先生之門。父病危重。
甚。武原山中求師焉。先生不許。勉為擬一方。持歸服
之。疾怪劇。五章憂惄。遂自訪其腕。此見吳様家思。今文
石所載陳君脩。克光贈五章詩。原注云。蓋五章為様家先
生伯祖也。

與吳玉章第一書

與足下交數年矣足下固執謙節初不得辭然嘗自疑以爲其趨不一終不能有益於足下必成兩悔時杌杌不自安今乃漸覺其果信也昨自山中歸獨不見足下面會文字問之舍姪云足下先數日過舍至期不作文而去強之不可且與舍姪言大約謂諸子皆游藝已不欲游藝者故不爲其立說甚高再則曰卽爲之必不能勝諸子故不爲其說又益下然高與下總不足論卽作文不作文猶小節耳獨以足下之病在心者深錮其本指與某相背謬故不得不一直

告也凡某之欲諸友爲文非以希世獵名爭區區詞
章之末也人之樂有師友斬明此理而已理之明不
明何從辨必於語言文字乎辨之知其所明者若何
未明者若何而後得効其講習討論之力故曰君子
以文會友以友輔仁旣曰輔仁第須於仁乎取之何
事於文哉蓋言者心之聲也字者心之畫也心有蔽
疾隱微必形於語言文字故語言文字皆心也惟告
子自信其心不復求義理之是非分內外爲二故云
不得於言勿求於心而孟子直闢以爲不可而自舉
其所學曰我知言今觀孟子之語言文字何如也斯

豈亦游藝所得耶且吾所欲爲文非藝也論語之所爲藝注曰禮樂之文射藝書數之法文者指其儀節言法者指其技術言若禮樂之本射藝書數之理之所以然則亦非藝之可名矣故朱子特注文法二字乃所謂末也然且學者必須游習以博其趣是則吾道無內外精粗之可分也益明矣况以程朱之說上求孔曾思孟之指能體會其義而發明焉則爲佳文不則相與辯駁極盡以期有合此亦格致之一道也奈何以藝之一字抹殺之哉足下謂諸子皆游藝蓋議諸子之不志道據德依仁也諸子於存心力行之

功誠有所未逮然從此見理日明其後亦未可量前
在山中觀足下所爲文愛其筆力夭矯曲盤固亦未
嘗不能文也特於義理有未然故抑擣其謬誤以相
告是足下工夫所少正於志據依處有不的耳其所
以不的正於文字義理不精察則志非所志據非所
據依非所依耳病在是而不思治虧欠在是而不求
益悍然以爲吾自有所得烏用是是病者日益病而
虧欠者日益虧欠以至於消亡也且足下自謂於存
心力行根本有實得乎則其譖默作止之間必人皆
得而驗之卽以今會業一事而言若果不願爲則當

辭之於早先期來矣及會而渝可謂誠乎晨訂而午
變言詞閃爍不可謂信以師命而赴不致告而避不
可謂敬衆友羣集卽不作文亦當終事而散倏忽逃
會可謂無禮如藝必勝人而後游則古今之能游者
寡矣不勝人卽不游謂好學者如是乎已則不能而
微譏他人務以求異求勝是不謙讓也辭氣悻悻岸
而不顧是躁戾而失養也凡此數者未病乎抑本病
也不力行之故乎抑不求知之故也然則足下之存
心力行與所謂志道據德依仁者果安在而欲以之
傲人勝人哉諸友平昔亦以足下瑰異之材果毅之

質流俗希有嘗與某私相歎跋以爲追琢有成必非
凡近所及故箴規過於切直者有之足下槩不爲已
虛受一擊不中輒思幡然颺棄壹何自待之淺隘也
子路人告以有過則喜故曰百世之師今既不能喜
矣又加憤焉其志氣相去幾千萬里更何以造舜禹
之域耶抑會文之事實出於某非諸友私集也某欲
諸友材質高下者皆講習討論於其中以求義理之
歸蓋某與天下爭學術是非之界正在此今足下自
以本心力行爲得而不欲從事於文義其本指正與
某相反然則足下之所非不在諸友而在某之立說

誤人矣而猶晏然自居爲足下之師不亦大昧罔無
耻之甚哉自白沙陽明以來以本心力行爲說不求
義理之學盈天下目前竊其緒餘以鼓舞賢豪者不
少足下旣見某說之非卽當早自決擇就其徒印證
焉或有以益吾子使可朝語而夕成也奈何依違腐
儒之門坐糜千里之足哉人之從師爲道耳豈爲世
情某雖不敏必不敢以此相責若必以昔日一拜爲
嫌卽以此書當某納還前拜之狀可也

與吳玉章第二書

大始來得足下札讀之不覺失笑笑足下之強欲置
辨辨而益彰也足下意止欲辨不赴會不譏游藝耳
然旣云不譏游藝不敢非我教矣又云羣聚會文不
可謂非角勝悅人耳目專詞章而離道德仁又云雖
非世俗社比然仍從事文義可不謂譏之非之乎且
吾所責於足下者爲心體有病而足下曰氣質之故
吾責足下以理義不明而足下曰機調生澁吾責足
下以本事之失而足下曰平日偏蔽辭其大而任其
細飾其近而咎其遠若以爲此日此事此心毫無過

失者則該所謂白強者也夫足下云云自以爲辨之而無過矣然而讀者以矛刺盾但見足下之過益彰者何也此卽足下輕視文義之效驗也文義不通病在心有蔽錮心有蔽錮病在不求明理欲明理奈何亦仍求之文義而已矣夫文義之不通豈止不善爲文哉凡語言書札動止無一足以自達者故文義非細事也至謂窗下拈題抒寫請教質正每月所限文數未嘗不遵而獨不可以會課此更非也某豈區區期足下以作文者乎王唐歸胡何足爲百世師足下不欲作時文卽已何必强爲但文義不可不通而理

不可不明爾若既可拈題抒寫則窗下與會課何異論語曰君子以文會友易曰麗澤兌君子以朋友講習禮曰相觀而善謂之摩古之學者皆以聚友論文爲樂未有閉戶私構乃爲有得者也又謂會課卽角勝起悅人耳目之心必至專詞章而離道德仁此更大謬不然昔朱子論試士比較之非謂其有黜陟進退以利誘人也程子譏爲文悅人耳目爲其以詞章求媚於世者也若師友相聚爲講習義理之文初無利誘亦非求媚卽曰角勝角是非精粗耳卽曰悅人悅師友耳又何患乎專詞章而離道德仁果其專辭

章而離道德仁將角必不勝而師友之耳目亦必不
悅矣孔子曰當仁不讓於師不讓於師角勝之大過
則將仁不可任乎孟子曰令聞廣譽施於身不願人
之文繡聞譽者悅人之所以則將德不可飽乎會課
之角勝悅人亦如是而已足下何厭惡之甚乎惟足
下欲速好勝之意一作文卽欲使友朋歎服而莫之
指摘此正角勝求悅人之隱根雖日處窗下拈寫而
此病益深不必會課而後有也至於變化氣質涵養
性情此是適道以上事足下頭路未清見解未的方
在未可共學中何言之倨也凡某之爲此言者非欲

足下之強順吾說而從事時文也止欲足下通文義
以明理明理以去本心之蔽而已乃足下曉曉徒辨
其未嘗非師譏友而初不辭其非之譏之之實皆坐
不通文義不明吾說之所指也今亦不須復辨足下
但取聖賢之書虛心玩味先通其文義而漸求其理
之所歸不必作時文有所見卽作古文論說亦得或
作講義或作書牘亦得此豈復有角勝悅人專詞章
而離道德仁之患乎若文義未通而曰吾以性命自
負道德自企此又諺所謂未學爬先學走者也世間
或有此法而某實不知足下自信甚堅則亦求其能

助足下者而問之可耳某自揣非其人誠不敢擔閣
足下時日他日足下遇其師片言了悟乃嘆爲此腐
儒枉費許時工夫遲我蚤聞道則某罪豈可逭哉因
大始歸便附此數言并足下前書批去惟足下察之

與陳大始書

玉章前會不作文逸去以不欲游藝立說甚可怪察其意大約褊隘不虛心欲速不求益而姑以云云自文耳然已是心術有病若認真以爲游藝不當爲則病在學術悖繆更不可藥矣不得已作一字與之足下取看以爲何如初八日僕村莊自值會足下先日須至玉章來否聽之勿強也吾所辨在此理此心是非耳非有私憾正不必謬爲謝過之舉也

與董載臣書

屢欲草數字以行人促迫而止然未嘗不念及足下
也僕在此只得書集多種爲快所遇人物大約世情
中汨沒多少好才質最上不過志在記誦辭章而已
都會雜沓誠然無人誠足壞人張先生所慮同流合
汙身名俱辱其言固自不刊但學者自問何如正要
此間試驗得過鴨子使繩縛止爲庸人說法也濟不
得事吾不解抱不哭孩兒寧遭簡點此意無從告訴
但歎息知人之難耳不審足下又何以益我也漢園
之變令人悲悼其人雖粗然下稍展拓得開不入鬼

寫活計惜哉今不可復得矣足下學醫張先生亦甚
憂然僕知尊公深此未可以口舌爭且學道而先違
親意亦無此理學奈何奈何兒輩失所依託令我茫
然失措又不審足下能爲我轉計否勿次草草

答祝兼山書

初謂相聚正久故未罄鄙私不意事違其願接手札殊惘然也然受徒講習自是儒者正業且易弟叔姪相叙一堂真人倫樂事正不必以離羣爲恨耳况論說之餘研閱方書原可並行不悖第過承謙抑自顧所得淺陋無以裨益高深輒自慙也張叔承六要一書本末兼該條理不紊不可不看其中病機治法二要尤爲精詳可守若齋中未備此書不妨遣人來取寒食左右鼓峰先生必至此時望過舍數日定有聞見之益醫雖小道非於理學明於世機淺不能精也

有便信時寄聞問以慰遠懷候晤不久不多及

與馬鑑侯書

立夫之病止是闇於義理而鄙於利欲吾固嘗言之不深責其欺也然朋友之道所重在信苟其爽信是卽欺也乃曰其迹似欺若其心本無他者譬之跌宕於倡樓而謂信足至此實無邪心人其諒之乎且立夫之爽信在返關之時已屬無解其後益甚耳大麻之館本非大始所求亦非吾爲立夫計也立夫自因失血急欲曬我來謀近地之館吾以語大始大始甚喜而定關然吾固知立夫闇鄙未必無中變猶未之教也立夫入省又屢遣信來問館事成否何如然後

信而與之未幾乃忽來返關則治病之慮寬而計較利便之私起矣今觀其字謂冬間至省如久歷波濤一朝登岸不勝愉快可知其始終本無意於此地師友之樂也前之求館爲病亟不得已耳病之旣愈館於何有然而給師矣負友矣當此之時已難免於欺之一字矣况又有後案乎卽明年在家之說亦立夫自覺不安而計出此吾未嘗督之也然而許我矣而又倍之爽德再矣又何必托名在家實有其心而後謂之欺也季冬廿一日之後正月初十日之前會不遣尺一謀之師友而卽安於杭是立夫之所欲也又

何云不欺哉然而其欺也實生於鄙而其鄙也實由於閭閻且鄙則固有已欺而不自知其欺者矣則雖謂之非欺亦可耳吾前在杭不意其在彼突如相見不免悵觸自念相與八年曾無分毫之益於立夫而使其顛倒至此又在家之說吾已徧告人人今實無以謝友朋更無以對大始吾之局躊更甚於立夫故但有黯然無緒而已非震怒也大始能無毫髮之憾吾甚服之况立夫於我從無愆尤又何罪責之有從此求明義利而克改之在立夫已事耳五月之來且姑緩之待吾慚之漸忘也便申卽以此意告之

與仰問渡書

昨載臣來致足下傳示沈孟澤督過之言不覺聞之驚歎雖夢寐之中亦不料及此已矣可勿復言然恐足下諸友有未悉者故聊白其概僕與孟澤向曾同社交本不深故孟澤原未嘗知僕僕亦不敢自居爲孟澤之知已也卽孟澤之醫初得之於宋穉圭及鼓峰至邑遂棄其學而學焉鼓峰旣歿孟澤乃不惜下問僕雖無知亦不敢不盡其誠數年以來孟澤之道日行然皆其才能自足以收之僕自問曾無涓埃之益於孟澤故亦未嘗敢竊以爲已功也况僕自村居

避迹惟恐問醫者之至堅辭曲遯至於發憤此自性
所不能志所不欲亦非外飾以爲高凡有問者必舉
孟澤以對此足下之所知也然則今日之云云又何
爲乎我知之矣孟澤譽望日隆其體不可復詘其勢
不可復受直言以自貶也思目前所不達時務而仍
爲直言者計惟僕一人所謂寧逢惡賓無逢故人耳
然僕自計之終不能復事孟澤矣僕之平生惟有一
直謂僕借私以訾毀雖他人不相與者未嘗爲之况
孟澤乎若欲僕曲徇標榜昧其是非之理唯阿諛是
從亦素所不能也昔金碧安有云用晦待我甚厚感

之不忘然其不堪處必將甘心焉僕之所遇大約如此亦其憇閑所自取不敢以是怨他人也古之假道學有言我日斯邁而月斯征各尊所聞各行所知無復望其必合也若孟澤更語及幸舉以復之手瘡初愈未能握筆口授兒子奉白某頓首

呂晚村先生文集卷四終